

Motlotlehi Letsie III,

Sechaba sa Basotho ka kakaretso.

Ke ile ka etsa polelo maoba ka la 12 Thlakubela, 2020 moo teng ke neng ke bua le Sechaba sa Basotho ka kakaretso ka seoa sa lefu lena le sa tsoa itšema bora lefatšeng le bitsoang Corona Virus (COVID-19). Ha ho qeea-qeeo hore lefu lena le ntse le eja setsi. Ke bua le lona tjena COVID-19 e se e atametse Lesotho haholo kaha Naha ea boahelani le rona e se e angoe ke lefu lena. Ke lakatsa ho nka monyetla ona ho fetisetsa kutloele bohloko ea 'Muso le Sechaba sa Basotho ho 'Muso oa Naha ea Afrika Boroa le Ma-Afrika Boroa ka kakaretso ka seoa sena se seng se ammeng batho ba fetang lekholo ha joale Naheng eo.

Sechaba Sa Heso,

Ke lakatsa mona ho le tiisetsa hore hang hoba Mokhatlo oa Lefatše oa Bophelo (World Health Organisation) o phatlalatse lefu lena e le Tlokotsi ea Lefatše, 'Muso oa lona ha o oaka oa phomola ho itukisetsa tlokotsi ena. Ka lebaka leo, ke lakatsa ho beha Sechaba leseling ka liqeto tseo Lekhotla la Matona le li nkileng tulong ea lona ea tšohanyetso hoseng hoa letsatsi la kajeno, tse reretsoeng ho sireletsa Sechaba sa Basotho lefung lena le atang ka sekhahla se fetisisang:

- 1.** Muso o entse qeto ea ho phatlalatsa lefu lena e le Tlokotsi ka hara Naha (National Emergency). Ka hona, ke phatlalatsa mona hore COVID-19 ke Tlokotsi ka hare ho Lesotho. Ka lebaka leo, Setsi sa Liboka sa Manthabiseng (Manthabiseng Convention Center), se tla sebelisoa e le sebaka se hokahanyang ts'ebetso ea Lesotho (National Command Center) toants'ong ea lefu lena.

Leha ka Mohau oa Molimo re so be le motho ea fumanoang a na le tšoaetso ea lefu lena, 'nete e setseng ke hore COVID-19 ha e khethe nku ka pere, mofutsana kapa morui, ebile

ha e ee ka tšobotsi. Etsoe Sesotho sere ho ipaballa ho molemo ho feta setlhare. Ka lebaka leo, re lokela ho ba malala a laotsoe, re nke mehato eohle e lokelang ho itšireletsa khahlanong le lefu lena. `Musu oa lona, ka tšebeliso `moho le mafapha ohle a Sechaba, o tla tsoela pele ho ema ka maoto ho netefatsa hore lefu lena ha le etse mofela ka hare ho Basotho. Lekhotla la Matona le tla lula le kopana bonyane ka mora matsatsi a mang le a mang a mabeli, ho hlahloba khatelo pele litabeng tsena.

- 2.** `Musu o nkile qeto ea ho koala likolo ho tloha hosasa ka la 19 Thakubele ho isa ka la 17 `Mesa, 2020. Hona ho etsoa molemong oa paballo ea maphelo a bana le ho theola menyetla ea tšoaetsoano lipakeng tsa bona. Lekala la Thuto le Koetliso le tla hokahana le likolo ka litaba tsena.
- 3.** `Musu o tla ntlafatsa taolo ea maliboho le hona ho netefatsa hore batho bohle ba kenang malibohong ba hlahlobeloa matšoaao a lefu lena. Re ipiletsa ho Basotho bohle ho sebelisa maliboho a hloaetsoeng ho sebetsa nakong ena eo lefu lena le ntseng le le teng ka hare ho lichaba tsa Lefats'e. Lethathamo la Maliboho a joalo `Musu oa Afrika Boroa o se o ile oa a phatlalatsa, `me setsi seo ke se boletseng ka holimo, se tla a hlahlolla ka botlalo ho Sechaba.
- 4.** Batho bohle ba kenang Lesotho ho tsoa linaheng tse angoeng ke lefu lena ba tla isoa libakeng tse khethehileng (quarantine) matsatsi a 14 e le mohato oa polokeho ea Basotho. Hotele ea Fedix Likileng ke se seng sa libaka tse hloaetsoeng tšebetso ena. Tse ling tsa libaka tse joalo li tla hlaloso ha `mila o ntse o puta. Basotho, bana ba likolo ekasitana le baahi ba Lesotho ba etetseng Naha ea Afrika Boroa ba tla sebeletsoa ka tsela e khethehileng e tla hlalosoa hamorao.
- 5.** `Musu o kopa Bahiri le beng ba mesebetsi ho etsa bonnete hore polokeho e teng mesebetsing, ho ba le libaka tsa ho hlapa matsoho ka sesepa metsing a

phallang, ha ho be le tšubuhlellano, 'me le lisebelisuo tse sireletsang tsa basebetsi (protective clothing) li be teng.

- 6.** Lenane la baeti matlong a tihabollo (Correctional Services), le tla fokotsoa. Batšoaruo ba bacha ba tla hlahlobeloa matšoao a lefu lena pele ba kena ka litsing tseo.
- 7.** 'Muso o tla pharalatsa thuto ka lefu lena ka liealemoea ka ho fapakana hoa tsona, sealemoea pono, ekasitana le litsing tsa kokelo (clinics and hospitals).
- 8.** Bana bohle ba Basotho ba likolong ka ntle ho Naha batla fumana tšehetso eo ba e hlokanang ho tsoa ho matlo a rona a boemeli ka tataiso ea lekalana la Manpower Development Secretariat (NMDS).
- 9.** Ke ipiletsa ho Basotho ho se khobokane ka bongata nqa e le ngoe, e kaba mafung kapa meketeng, kapa mesebetsing e feng kapa e feng. Ha ke rialo, ha ke bolele hore le tlohele ho pata bafu, ke mpa ke ipiletsa ho lona hore le be hlokolosi ha le etsa ts'ebetso eo le qobe ts' ubuhlellano.
- 10.** 'Muso o tla bua le Lekhotla la Likereke (CCL), Civil Society, Bahoebi le mekhahlelo e meng ea Sechaba e le ho tšoarana ka matsoho toantšong ea lefu lena.
- 11.** Re tla tsoela pele ho sebetsa 'moho le metsoalle ea rona 'moho le Bafani (Development Partners) tabeng ena.

Basotho ba Heso,

Nako ena ha se ea ho betsana ka majoe le ha e le hona ho fumana lintlha tsa lipolotiki. Tlholo ea rona re tla e fumana ha re tšoarane ka matsoho bohle, re le 'Muso, re le

bohanyetsi, re le Sechaba sohle sa Basotho. Hona ke tlokotsi e re tjametseng bohle, ka hona ha re se shebaneng hore na mang ke mang, ke mo rata hakae kapa ke mo hloile hakae.

Thuso ea rona e tla tsoa kae na - thuso ea rona e tla tsoa holimo marung ho 'Mopi oa rona, eena Tlatla Macholo 'Mopi oa Leholimo le Lefatše eo Atla tsa Hae li leng maroba ke ho bopa masea. Ke le mema ke hona Basotho hore letsatsi le leng le le leng ka hora ea leshome le metso e 'Meli, re etseng thapelo likhutloaneng tsa rona ho kopa Morena Molimo hore A mpe a re hauhele.

'Muso oa lona o tla khutlela ho lona khafetsa ka mehato eo o ntseng o e nka ekasitana le khatelo pele toantšong ea lefu lena.

MOLIMO O BOLOKE LESOTHO LE BASOTHO.

KHOTSO! PULA! NALA!